

**Laporan Akhir PPPM Dijangka Siap Beberapa Minggu Lagi, Kata Muhyiddin Bernama
1 Disember, 2012**

KUALA LUMPUR, 1 Dis (Bernama) -- Laporan akhir Pelan Pembangunan Pendidikan Malaysia 2013-2025 (PPPM) dijangka siap dalam beberapa minggu lagi, kata Timbalan Perdana Menteri Tan Sri Muhyiddin Yassin.

Muhyiddin, yang juga menteri pelajaran, berkata pelan itu adalah dokumen yang amat penting yang menunjukkan kesungguhan kepimpinan kerajaan dan Barisan Nasional (BN) untuk mengangkat darjat pendidikan negara ke tahap yang lebih tinggi dan berkualiti.

"Saya ingin mengambil kesempatan di sini untuk merakamkan ucapan terima kasih kepada presiden parti selaku perdana menteri yang memberi sokongan penuh kepada PPPM termasuk di peringkat awal ini dengan menyediakan peruntukan setengah bilion ringgit dalam Bajet 2013," katanya.

Beliau berkata demikian ketika menggulung perbahasan pada Perhimpunan Agung Umno di Pusat Dagangan Dunia Putra di sini.

Muhyiddin berkata peruntukan itu bagi menjayakan pelaksanaan pelan tersebut mulai tahun hadapan.

Selaku timbalan presiden Umno, beliau mengucapkan terima kasih kepada para perwakilan perhimpunan itu yang memberi sokongan terhadap pelaksanaan PPPM.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=713243>